

摘藻堂四庫全書薈要

集部

欽定四庫全書薈要

集部

御選明詩卷三十二

詳校官原任事臣李斯咏



欽定四庫全書薈要卷一萬八千五百三十二

集部

御選明詩卷三十二

五言古詩十七

周如磐

采菊

高秋凜風色百草遞萎黃  
嘉彼東籬英參差裛露光  
采之不盈掬悠然傾我觴  
杖策寄事外仰視歸鳥翔  
會心水木間獨坐以徜徉

袁世振

春雪山中效歐陽體

微陽滯幽谷未雪意先冷夜定松吼急衾裯暗告警夢  
回疇昔在所歷猶耿耿板牀廓無帷瓦際寒光同始覺  
土室陋宿塵如掛縋老婢把濕茅稚子弄冰竅跋屐探  
空林千山同一逞門前牛犬跡木末鳥雀影何必侈堅  
臥無干清晝永

董應舉

秋日尋孔崔菴通上人

林深不辨徑，積葉翳寒泉。  
屋角留殘日，秋階童獨眠。  
問師何所去，遙指隔江煙。  
夕磬無人發，林中聞暮蟬。

徐彥良

落葉

落葉不上枝，因風亦復起。  
清風本無私，何因有彼此。  
一葉隨飄揚，一葉沾泥滓。  
寄語風前葉，莫墮東流水。  
多謝三春風，山中多蘭芷。

范鳳翼

征途

歲晚疲征途  
籃輿載歸夢  
野風吹又醒  
明月勞相送  
荒村燈火微  
遠寺鐘聲動  
投宿僧寮中  
所忻酒盈甕

盱眙山中

山家住林坳  
林昏嘗晏起  
石隙日初明  
午雞動墟里  
歷落下山椒  
得此林塘水  
水鳥戲街魚  
悠然步河隄

高出

箕山

箕山於太室如岱有梁甫輔嶽並稱尊他山遑敢侮  
潁水源更清石流歷可數所以讓王人洗耳臨其澣一瓢  
棄陶唐飲牛媿巢父後代鮮若儔高風激千古

黃汝亨

西山

悠悠逆旅間忽忽意不展振策西掖門佇覽西山巘北  
風紛車塵曉日出林現遵塗泛洲渚披草踐平行水清

既近矚峰遠亦流緬故術尋嶮歟新蹊遞深淺靈巖恣  
冥搜秋容歷餘眇營魄境互託貴賤理無選微尚儻有  
愜非譽自茲遣

初秋過英山遲劉幼安先生

暑氣清雨餘涼颼起秋夕越陌攬稻穰穿叢度林隙涉  
津既得崖入山詎分席白鳥下飛翻明湖坐澄碧緬懷  
物外人相將品巖石

登攝山



委曲歷巖岫振衣攝山頂心目頓以豁廓然開一境達  
觀無近懷高步寄遐引林壑漲松濤虛空墮雲影遠霧  
冪大江荒烟迷萬井東南折吳楚攬之若浮梗吾生嗟  
有涯意氣詎能騁聞茲有靈藥可使顏齡永願與山僧  
期依緣同結靜

曹徵庸

黃岡道中

芳草展柔綠十里冒長堤藤花覆高岡下與垂楊齊穀

雨春欲盡雙禽互悲啼行子感于役思歸息山谿閒看  
理綸繩坐釣桃花西及春事耦耕煙蓑引鉏犂斗酒勞  
作苦壺觴恣提攜何為深泥中沒此青驄蹄

尹伸

病後田園雜詠

山居廢牆垣始成廊一曲其外數折渠尚待春泉綠水  
邊忌蕪穢花石當豫蓄蘭蕙此易求盆盎生機促植聞  
宜女手根喜傍脩竹精思在一藩雞犬豈易逐匪獨愛

其生潔性不可黷幽芬被徑開朱欄亦不俗

張以誠

懷舅氏馮集甫

驪駒唱春風蕭條忽秋色玉露零空庭徘徊悵永夕高  
歌轉成悲追陪念疇昔狂呼月下尊笑展花間奕清言  
競傾倒謔語互彈射歲月曾幾何關河邈睽隔依依渭  
陽情冉冉光陰擲風塵惜離羣偃仰甘屏跡珍重雲中  
書深慰薊門憶浮雲斷南天白日黯西匿申章何以報

但願加餐食

王衡

初秋月夜園外散步

微風拍秋螢款款飛欲高時來觸團扇近人光自韜豈  
無燈燭張憐汝飛蛾遭羣動亦有息農務鄉所操絡緯  
索索啼織婦行已勞

我田占城稻七月先登場橋西歷歷黃半頃收夕陽東  
疇剛放花露氣浮甘香力入雖云薄幸免秋雨荒早晚

粳酒熟鄰父歡來嘗

琉璃橋步月

蜿蜒百尺橋下有千里流灣環闔明月澹澹銀浦秋漲  
渦蹙高浪魚龍頽不游呼吸挾風雷石勢兀欲浮遠天  
星可捫廣野煙相樛行人走陸陸杯酒誰為酬吾將款  
白虹飲我湖水頭

答岱宗外舅

我有越紉素一日再三洗褰裳過天津見人且掩耳京

洛正日中美言如可市但恐謀生拙飄零愧妻子

公鼎

歸田雜詠

導汶自艾山南流達新甫東蒙配岱宗其首挈鄒魯一  
山一水間幽勝略可數薄營本荒陬芟除闢宿莽雙溪  
作襟帶連岡若環堵結屋八九間開徑數十武欹仄植  
亭棧夷曠築塲圃畚鍤連朝昏胼胝易寒暑但求靜者  
便不厭作者苦

避地恐不深吾必在汶上曠野多平疇游目足自廣南  
岡一握中林麓稍森爽石壁拓精舍石門劖新壤陽崖  
連陰峰遨遊愜心賞呼兒荷鋤鋤攜儷治績紡既欣禾  
豆登復見桑麻長八口可無飢亦足代祿養豈必規達  
人庶幾屏塵想

遠遊得暫歸機事久方釋漸與朝市遠轉戀林野寂田  
疇日以親風雨頗相習農人告及春欣然顧襁負杖  
桑陰午荷鋤麥隴夕遶屋榆煙暝隔水梨花白遠目任

縱橫安步隨偃息一區安蓬蒿一盂飽橡栗溪山本不  
廉琴酒堪自適

擬杜遣興

人苦不知足有願何終極當其入天門猶未厭羽翼一  
朝成蹭蹬唾井無復惜昔日李將軍灞亭人不識

董光宏

補陀

東南澤國半往往饒異蹟大海峙補陀懸崖幾千尺層



波山震撼斷柎石蒼赤明滅九點煙超忽萬里舶翻風  
鷺鳥退近岸亂帆擲西方有聖人東海乃其宅年來詔  
使至旛幢颭巖石我亦飛渡來流覽感今昔摩挲蒼筤  
花四望曉天白

袁懋謙

擬古

行者日以行思者日以思日月相代謝荏苒踰歲時君  
子在萬里獨宿誰與怡徘徊增感傷託夢通音徽音徽

不可接涕泣沾牀帷披衣還起立東西迷所之

熠熠花間螢照我庭東廂高飛不能起歛羽舒其芒云  
是腐草化耀此玄夜長逢時被渥澤朽質自生光

茅瑞徵

送薛駕部還陝

朔風日以厲肅軫超西秦行行歸故鄉而我失所親與  
君同舍郎况乃託比鄰相望朝伊夕綢繆亦有因一旦  
出門辭飛飛關陝塵仰盼浮雲駛悵然憶遠人懸知經

歲別分手自愴神願展平生意河梁寫其真聊將盈尊  
醪叙此離情新我亦賦歸來離合難具陳

劉宗周

送祁世培北上

清時起威鳳乃在丹穴藏羽毛蔚五采顧盼周四荒已  
負絕世姿竦身猶彷徨天路不足擬所思在求凰止必  
擇梧蔭鳴必于朝陽遂為虞周瑞躋世以平康

用韻答劉湛陸翰撰

濯濯園中梅矯矯雪中植凡物貴後凋君子尚消息稍  
逢天運周春風意何極但嫌少嫵媚妬彼桃李色孤賞  
賴伊人庶以葆玄德

顧雲鴻

雪夜夢與受之登樓境界超遠已覺恍有所得  
口占紀之

任城臘五夜雪勢浩方永擁裘深帷中照見鬚眉影神  
馬挾馮夷我馭何不騁遂登白玉樓俯視方壺頂秋陽

鬱平林下界亦井井有美樓居人含毫發奇韻拍肩遂  
其歌綺思一時冷談笑聞鄰鐘冷然得深省

徐冽

讀考槃集贈趙凡夫

幽居理玄撰曠覽獲新辭雲霞絢以麗星斗粲離披浩  
蕩思無垠獨與寥廓期脩然滌塵襟習習生涼颼雅音  
久淪寂嘈雜徒爾為一聞仙呂奏瓦釜安能施

夙昔好巖棲卜居寒山隩闢異披荆榛百堵聊自築甃

石封瑤草編籬間脩竹偕隱事君子叱耕有麋鹿棲居  
列羣書暇遊時縱目綺藻何繽紛六銖垂霧縠逸志謝  
囂紛深心寄玄穆天末翔孤雲覓哉迴難逐

婕妤怨秋風文姬悲塞土藻雅雖縱橫所嗟為情苦夫  
人抗遐標亭亭厲千古俗響難為工清徽亮堪撫名理  
既已超夙秉先民矩况復悟逃禪沈幾恣採取柔翰非  
所耽餘勇庶可賈托迹在考槃碩人自侯侯羨昔賦五  
噫德曜終遜武孰是捐塵踪高冥振綺羽迫切區宇中

寥寥莫與伍

張鼎

讀書

松風並竹响萬籟皆笙竽高韻清入雲琅琅讀我書  
癡長畏人畏人人跡踈竹葉掃空堦白雲抱前除良宵  
孤燈坐酌茗陳編鋪頗似侶羲皇聊復賡唐虞踈鐘散  
叢林宿鳥巢高柯月印水晶簾風裊博山鑪眼明心亦  
快時探罔象珠愧彼斲輪者糟粕真蘧廬

汪輝

春日山行

過嬾倦官遊歸來且多務命駕偶山行始洽泉石趣入  
澗窮窈窕陟峰出雲霧細雨灑春寒輕風飄日暮俄為  
桑門訪忽值友生顧蔬酌供野興晤言寫情素高原恣  
遐眺幽徑暫閒步眷此永日歡信彼顏齡度城市苦氛  
囂誰能舍之去

過庭訓



辛酉秋日遊茅山

海內真靈居茅山踞如虎舊傳三弟兄各作一峰主仙  
人長往來華陽稱洞府百里借遊遨信宿樂茲土是時  
秋正清諸峰可歷數高觀揭天中時有白鶴舞地肺豈  
虛名真誥傳自古何當騎茅龍豈復應圭組

王象晉

言志

通籍三十年息肩猶未得靜中自尋思永夜勞轉側來

日苦無多胡不惜筋力富貴如浮雲百歲猶頃刻世途  
多險巇反覆無終極何不早挂冠戚友相親慙西塾課  
兒孫東皋藝黍稷早畢公家賦早完私家債濁醪聊適  
口麤糲堪供食八口可無飢四鄰好為德時而曳杖遊  
時而曲肱息一事不縈懷兩耳常緊塞用以怡吾神徇  
佯華胥國

劉脩昌

增城流杯石

增江有怪石形容類虎丘亦可坐千人而多巖厓幽曲  
澗自天成或云鬼斧修仰承千丈泉驚湍變安流土人  
不好事經年罕來遊我行及暮春風日妍且柔結伴得  
數子大半高陽儔脫舄坐曲澗杯盃任所投欲去忽復  
往將沈還能浮徘徊若就人想為知己留觀者盡拍手  
我意徒夷猶歎息下山去空坡驅羊牛

李流芳

過皋亭龍居灣宿永慶禪院同一濂澄心恒可

諸上人步月

歸裝出西湖間道向黃鶴

黃鶴峯為皋亭最高處

屢愆桐塢期偶

遂龍居諾

桐塢為慧文法師結廬處在皋亭之西屢期予過彼竟不果

輕舟凌晨風

遙山滿晴郭丹林尚可數寒條紛無託披松指微徑聽

水捫閣壑新構爭遠勢平臺攬搖落霜餘山容淺天清

海氣薄暫歇塵勞心始知寂滅樂

每多方外遊見僧即如故燈明一龕下夜長愜深晤不

知山月上千林已流素出門尋舊溪愛踏松影路氣和

空宇澄寒魄如春露去寺不數武回矚驚莽互幽泉洗  
我心微鐘杳然度

德州道中

北地行欲盡始覺春萌芽村柳色已新藹藹煙中斜渡  
河指齊郊河邊見歸槎淮徐行在眼吳會亦匪賒道路  
空苦辛分定勿復嗟生不愛京華不如早還家還家春  
未暮及見桃梨花

遇雪戲示子將

曉起占天色青天無纖滓占者忌早晴  
暫晴亦可喜  
矐日未舒同雲復瀰瀰須臾密雪布咫尺如萬里  
但見雲濤來茫然失涯涘  
去住無所憑始識汗漫理  
天公作此戲聊戲吾與汝

雪夜至恩縣作

日暮雪色深曠野絕行踪  
輿人惑四方東西視天風  
忽然見新月冉冉來雲中  
雪亦能照夜得月光始通度  
彼九曲坂賴此兩素容  
不知城郭近杳爾聞微鐘  
我從天

未來已覺下界空

東阿道中

客舍東城隅西山眺望間朝見積雪斑暮見落日殷平生愛山心對之了不關今朝穀城下春水始一灣麥畦綠照眼上有青螺鬟忽如逢故人一笑開襟顏山水只如此值我歸興閒歸亦有何好試問此青山

鄒縣道中

春光無次第雪後景已暄愛此沙路平青山壓晴原下

車策蹇行並轡相笑言遠峰翠欲滴近岫勢屢翻惜未  
及花時指點桃梨村悠然渡溪橋下有碧潺湲投鞭一  
盥漱為我洗煩冤

登北固下並甘露港還舟夾港多櫻桃園

北固行坦迤平岡若修塍江山出兩腋羣物無遁形顧  
盼收金焦遙遙控層城城中起炊煙山氣相與凝日色  
射遠江躍冶光晶熒天水上下同微波不能興翻思弄  
舟好失我向所驚下山尋花溪落日噴朱櫻花亦愛晚



妝高低衆態生穿花藉草坐歸路杳冥冥

戲示山中僧侶

山居不須華山居不須大所須在適意隨地得其槩高  
卑審燥濕涼燠視向背樓閣貴軒翥房廊宜映帶或與  
風月通或與水木會臥令心神安坐令耳目快皋亭美  
林壑中塔亦稱最一樓負山立圭竇如向晦山僧請余  
往余性苦不耐勸令開八窓吐嗟變湫隘前楹布清陰  
後戶攬蒼靄玲瓏稱人意蕭爽出塵界巋然謂山僧此

中固有解往往住山人不知山好在我昨居新菴結構  
亦可怪居然仇涼風似欲杜靈籟古梅如老宿亭亭使  
人愛其下安竈突柯條半焦壞悲哉冰玉姿坐受熏灼  
害見之熱五內如身被桎械誰當共拯此移竈出樹外  
面南闢小扉日與香雪對區區一緡費功德及萬倍吾  
言不見用終為未了債

訪秦心卿溪上嬾園不遇有作

溪上好園亭君家聞最勝經過已廿年今始識三徑翳

然臨水間愛此飛閣映位置不在多貴與風物稱主人  
意疎豁事事得真性我來不相值維舟柳邊暝見戴自  
無須悠然發孤詠

唐時升

園中十首

錄三首

自為灌園子職在未耜間秋來耕耨罷獨往仍獨還河  
水清且漣紫蓼被其灣躊躇落日下聊用娛心顏瓠葉  
黃以萎其下生茅管遂恐穿堤岸嘉蔬受板援丁寧戒

僮僕耰鋤當宿嫺晏安不可為古稱稼穡艱

鸛鵒出林莽羽翮半摧殘于人兩無猜終朝自盤桓仰  
若有所語俯若有所干日暮相隨歸于繞檐端朝鳴  
隨所止夜宿隨所安本非雲霄姿不必慕高鶩永無鷹  
鷂患勿羞雞鶩餐

鶴鳴在林樾山谷有遺音置之闌闔間三載如病瘖禽  
鳥自有適人亦自有心嗟余實鄙夫翰墨非所任廢書  
動旬月篇籍皆凝塵唯于場圃內時時發長吟澹如酌

玄酒鏘若調素琴為語二三子幽賞宜共尋

對酒懷里中諸同好四首

錄三首

濟之沈淪者家有常稔田不能治生產朝夕長燕閒甘  
泉貯屋後美蔭交堂前茶香至日夕圍碁自窮年客來  
輒呼酒五木鏘鏘然所貴志意愜何必致肥鮮東風卷  
海水震蕩婁江堧玉粒入洪濤所憂粥與饘亦知性好  
客何以得酒錢咫尺行遊地欲往還迤邐

伯咸意落落落賓客常滿堂通達曉萬事要言不可忘肅

爲老成人而亦好壺觴晉楚爭盟主申韓制令章我時  
在其間得雋神揚揚烈士惜暮年讀書城南莊出門蔭  
榆柳臨沼出鱖魴田廬信可樂奈此道路長憶昔酩酊  
飲一月八九場今此不十一餘日多淒涼

伯隅人如玉文質爛有餘縱令樵蘇絕豈與芝蘭疎况  
乃陳鼎食文憲夾綺疏石闌涼風至山閣霽雲初樹色  
依几席花香媚衣裾應門謝高蓋入座多比廬易水清  
且瀉薏苡動盈車北人善釀法吳越不能如安得共一

醉以洗久鬱紆停雲西北征佇立以躊躇

和飲酒二十首

錄八首

初夏天氣微熱方不欲飲偶龔仲和邀看園中新  
綠出所藏名酒意甚樂之次日捉筆和淵明先生  
飲酒詩數篇與索一尊獨酌會雨窓無事遂盡和  
其韻

我本磊落人憂患纏綿之唯逢酣飲處亦有開眉時暮  
年學恬淡意復不在茲昨宵遇名酒曠然散羣疑滯雨

苦寥落一杯思自持

日夕擁羣籍里巷如空山偶逢會心處思與古人言古  
人去已遠近者乃千年不如營一醉妙理默已傳

昔在少年場終夜歌呼喧相將酩酊去月落城西偏風  
流雲散後酒壚邈河山君家素愛客朝往常暮還良醞  
倘可分獨酌當晤言

清和惟首夏百卉揚菁英有酒不自醉無乃非人情丹  
霞映四野白日將西傾中庭細草中蠅蝓相應鳴微月



堪徘徊蚊蚋猶未生

東海有貧士本非希世姿  
獨立龍門桐百尺無傍枝  
中含徵音其外則無奇  
棄置溝瀆中屈辱無不為  
猶然自偃蹇麒麟安可羈

貧賤難久居固窮亦有道  
有酒且為歡居常以待老  
朝華既夕萎春榮亦秋槁  
造物于羣生安能盡美好  
回視靈臺中中有不貪寶  
孰知被褐徒光輝照四表

人生歡樂趣不必求異境  
三杯恍然醉一枕憬然醒  
此

意不能言當時心自領  
春雨麥成粒秋風黍垂穎  
計我終歲需誰能與五秉

鳩能知天雨鵲能知天風  
嗟哉此微禽託命風雨中  
用志久不分遂與造化通  
吾亦晚有聞天道猶張弓

和雜詩十一首雨潦不歇獨居一室多憂生之

嗟錄一首

東南神仙宅靈異惟會稽  
神禹治水畢玉書藏中崖  
何當有朱雀銜以置我懷  
百神各就役九州再縫彌  
雖苦

淫潦事父子不相離  
支祁欲躑躅俯首重受羈  
三農各飽飯兩稅亦不虧

婁堅

還自廬州呈孟祥用卿

巢湖亦云險曠焉豁心胃  
於時雪初霽山高玉巖從衆  
山亦邐迤拱揖互為容  
風帆頃刻過我目不得窮  
但見連檣來橫亘若垣墉  
緬懷草昧初舟師景元戎  
至今趙與俞廟食崇元功  
奈何濡須塢紛紛鬪梟雄  
非無爪牙

士所攀非真龍信知聖人作萬象開晦蒙

一踏江南地歡如釋重負籃輦入寒山雲物明可覩蒼  
鱗飄脩髯葱翠引余步試問雨雪無此中未寒沍攝衣  
上層巔風恬得春煦金焦時出沒對峙若牙互空江卷  
波濤遙聞勢彌怒其陽列衆山雄秀競奔注瞿生抱微  
疴犖确行不顧語我平生遊必躋最高處不然隔培塿  
茫然墮雲霧此語絕可思頗愜游觀趣當及未衰年從  
子窮山路

秋日赴友人席修微有作同賦

移舟漾漣漪得涼乍如沐所愛前溪風清音度修竹一  
見意已消少焉神更穆譬如珠在淵自是鸞之族我友  
具壺殯相邀曳綃縠揮杯逗輕颺灑翰低華燭欲別徐  
徘徊深心寄睂目歲月倏已賒詩篇寄幽馥吾猶媿良  
媒子其慎穆卜毋以軀千金等之棋一局

登虎丘寺閣

茲山寶薈蔚能使流目迷高閣出樹巔連峰亘其西平

生山中客今來始攀躋浮圖勢更高登之憚層梯聊此  
窻閒眺已覺飛鳥低平疇帶曲水遙見來時蹊高下各  
有適物理將無齊

程嘉燧

自茶磨入治平寺

日昃山路閒林木紛如結環溝引湖流經橋見曲折路  
枉寺門出高榆對森列連岡亘城隄缺斷宛當闌斜日  
射山翠玲瓏暎松徹香氣行客聞心閒忘分別

入殿左僧舍下遵曲徑仰見崕端高軒絕可舒  
矚

僧房高下居閉門秋色閒陽樹挺幽徑陰崖仰層關周  
垣若澗底疎翠當窻間窻中如有人聞聲杳難攀遙知  
縱目處樹杪見前灣白日山後沒好月湖中還念此來  
何時使我舒心顏

宿牛首

城南遍蘭若茲山何穹窿鞍馬上幾盤迫察勢猶雄崕

是日半傾光射東南峯闌干倚峻壁毫末紛玲瓏路迴  
見塔寺到門羅杉松積翠扶層堦暝色帶遠江高殿夜  
突兀古木枝龍蓀尚駭仰睇賒未覺俯歷崇細路繞殿  
角欲上聞鳴鐘捫蘿踏深影林幽徑難通悄然心神悽  
却顧來驚風下歸白雲梯微月光腫朧明當上絕頂冥  
搜恣所窮興劇耿無寐清宵殊未終

送李長蘅北上

送子復行役前期登北固焦嶺宜終宵江光洗月露挹



彼萬里流話此兩岐路郡郭未可越圓景已盈度虎山  
亦清絕心賞諧遠慕離悰自少歡陳迹况多故昔遊矜  
紅顏雙頰俄被素悠悠百年間徒為俗所誤

陳繼儒

山中作

張鎬九尺餘鬚眉皓然久用之帝王師不用窮谷叟低  
頭事躬耕千載無其耦寶劒用作鑱悲歌刈霜韭

錢龍錫

初入翰林述志

皇風被奕葉師濟協重熙妙選金閨彦登茲白玉墀  
慚予蹇劣士何幸沐恩私就將彌日月摹範承師資雕蟲  
既云拙溫飽匪所思獨此葵藿心耿耿誓不移念昔皇  
祖日講藝恒孜孜天顏瞻咫尺密室奉疇咨衮德信多  
補臣忠實在茲顧問久寂寞簪笏徒委蛇四郊漸多故  
啟沃効者誰所願回宸照堂廡路不歧

楊漣

宿漢口回龍寺為恒空上人作

江上一拳石環以數株樹精舍隱老僧問年不知數黃  
鶴舞對江鸚鵡來蒼素清磬發閒情風檣任沈汨試問  
在舟人能得高眠足老僧笑不言江月澹超忽

左光斗

早秋讀書竹林自述

寂寞太沖子居卜愚公谷別策開林陰曲徑盤修竹湛  
湛秋天長娟娟秋氣穆日晏足高眠報道晨炊熟憑闌

數視天振衣理新沐楓葉淡初黃旗茗烹嫩綠豁眼拭  
遺編琳琅一再讀激揚芳麓雕宛轉枯枝燠儘校不為  
讐得意隨手錄貝葉時一繙跏坐禮天竺無花平石牀  
有牘連茅屋倦即拂枕眠醒復愁災木兒童狎至前客  
子來不速送迎總在門往來皆大陸非寂亦離喧雖雅  
頗近俗何當薄暮時澄天淨如浴松聲咽管絃荷花裊  
馥郁暝色奔不停牛羊紛紛逐對景得新詩把盞傾蘖  
麴長歌誰與言息機吾也獨

詠懷詩示繆西谿宮諭

玄鹿遵長林白鶴舞晴雪山中有神人避世修隱訣呼  
吸通神明坐對忘寒熱出世君何長入世我何拙煩師  
指病根迷途頓悟徹長路近雙履霜飛水凍冽

鄒維璉

述懷

羶途難久居盛名寧久留所以鷗子五湖一扁舟應  
無雄辨士俯徇燕客求四時忌成功急湍無安流美服

人所指權利倍添憂

古意

百年苦瞬息人事復乖違園中桃與李安能久芳菲天  
風掃枯葉北雁忽南歸嗟我行役人年年戌金微感粟  
自西來游子未授衣嚴霜墮關塞明月照孤幃兩地共  
搖落兩情共歛歔

秋興

鵝臬得腐鼠輒以嚇鵝雛鵝雛飲清露高飛棲碧梧飄

然樊籠外野性常自如鷓鴣  
梟即飽食能無畏張弧古云  
鹿生山命已懸庖厨達人訪  
物理深藏賦遂初

錢文薦

月下懷馮正子太史

夜坐林木清見此池上月羣峰忽已淨孤雲澹將沒  
愁深白鷺渚夢斷蒼龍闕望望曙河遙思君不可越

丘兆麟

洳河

四月泐河濱運艘千百櫂我舟銜尾來偶與同起止八  
牕閉九日一旬得百里前途牕更繁閉者轉難啓轉漕  
四十斛至僅一石爾庶土勤輸將咽喉實在此一夫若  
當關萬夫不足恃意外事未然平陂亦物理君相共策  
籌庶乎消不軌

鍾惺

瞿唐

至此始稱峽岸束江齟齬江勢有往還前山幾茹吐兩



崖何所爭終古常相拒水石日夜戛無所觸而怒灩澦  
根孤危悍流不能去立石如堵墻中劈才一縷岸迴不  
見江舟行無乃迂舟過其隙中乃知此其戶還顧始自  
失憮然警徒旅

### 西陵峽

過此即大江峽亦終于此前途豈不夷未達一間耳辟  
入大都城而門不容軌虎方錯其牙黃牛喘未已舟進  
却湍中如狼獾其尾當其險夷交跳伏正相踦回首黃

陵沒此身才出匭不知何心魂禁此七百里夢者入鐵  
圍醒猶忘在几賴茲歷奇奧得悟垂堂理

虎牙狼  
尾灘名

朝

蓐食初戒徒新暘淡寒岫光薄始著林映帶自先後日  
盛宿煙避遠見山水候我行久出峽始得覩清晝

遊茅山

山以人得名去來關隆替犯雨訪句曲諒亦有冥契依  
夕忽如朝輿步踏殘霽天高百靈肅山空衆響厲嶺上

自白雲真人已天際始悟洞壑迹祇是真仙  
蛻按圖窮物隱歲晚冰霜閑

譚元春

送閔同生還茗

竟陵生桑苧吳興明松雪我留茶外思君補畫中缺  
吾家盛池塘芳草芳不絕入君幽夢長舟盡添車轍

王志堅

寄長蘅二首

少小事編摩謂可操左契及乎當得失輒非向所計年  
來變態屢追時迨如謎屈伸苟不爽冥冥失權勢咄哉  
司衡人實乃天公隸一編餘故簾字畫麻姑細彷彿共  
丹鉛深夜重門閉十年夢幻身感此潛欲涕

吾觀仕宦人每每念丘壑雖復非真實茲意或間作譬  
如酒食困翻思茗飲藥病苟稍稍去旋復恣饒嚼嗟余  
困折久甫得離蔬屨救口猶不遑何遽厭杯杓念吾堅  
頑姿本自甘蕩落茲游非得已黽勉就人爵人生能幾

何胡為久薰灼寧為沙上鷗無為籠中鶴山靈聞吾言  
生平謹然諾

張世偉

題畫竹卷

淇澳紀衛風渭濱存漢官彼美君子德致用非一端何  
來託根非遂覺據地難或欲拔千條或須斬萬竿人情  
夫豈遠忌等當門蘭湫隘匪所宜根株貴得完可以傾  
朝陽可以凌風湍無為人所媚無為物所干庶幾松柏

朋相將保歲寒

聞啓祥

過澄懷閣

昔我離山居閒池點青萍今我復來茲所聞盡秋聲曾  
是俛仰間時物忽已更因之發長歎慨然念無生

王心一

上太行

驅車上太行山頑無奇石逶迤有千盤石磴轉偏側譬

如摩空鳥漸與青雲迫俯見蒼崖間春花間紅白山家  
愛尺土縱橫界如畫上有千年碑孔父留轍迹摩挲落  
日遲返景射石壁祇慮豺虎驕解鞍投荒驛

繆昌期

賦得夏母篇書文太君障子

有序

夏忠靖母廖夫人忠靖幼孤夫人教之嚴而愛事  
姑甚謹姑病執其手語曰吾無以報汝願汝壽過  
我子孫事汝如汝事我忠靖拜大司農夫人年八

十晉封太夫人三楊及胡祭酒諸公皆升堂拜焉

忠靖掌邦計母廖尚皓首別殿賜宴歸高堂介眉壽是  
時長陵中羣公並耆舊三楊列館閣胡公為祭酒連鑣  
登母堂却行拜階右鏘鏘委佩聲肅肅奉觴走母也徐  
唱言雍容三爵後上云主恩深報稱莫相負下云計臣  
勞提挈視吾友嗟此良宴會明時信非偶誰與矢德音  
乃在一寡婦養姑泣下泉持家敝箕帚尚書信卿才訓  
迪自黃口蟲魚箋獨勞鈞軸教已久繇來孤貧兒往往



踐台斗

劉榮嗣

家兄至

兄弟半年別相尋  
屢夢寐書言春當來  
旦暮勞占計馬足  
已到門遠盼猶天際  
宜歡不暇歡交零  
涕與泗鬚髮似曩時  
齒缺聲音異喟然感  
歲華寧復堪遠離

方大任

詠懷

束髮慕奇癖讀書萬卷餘游思緬邈場削跡焚華塗舉  
世爭捷徑欣然笑其愚稟氣固已然改轍將焉如孔生  
恥溝壑原子安桑樞素志亮有託斯人豈盡迂掩耳謝  
時賢一心抱區區

徘徊芳塘上微風扇輕波連岡蔭青松仄徑冒綠莎是  
時秋正深秔稻蕃陂陀腰鎌朝出隴捆載夕歸家烏雀  
啄場圃牛羊散巖阿曰余無立錫鼓腹行謳歌拾穗甌  
窶間一飽不願多嗟彼攘攘子鼎食終如何

孔雀游赤霄牛角何由觸麒麟可繫羈翻為犬羊辱伊  
余類窮猿投林不擇木悠悠長傍人顧影傷局趣百鍊  
忤時好繞指乖素欲犁鉏倘可給誓息西山麓

方孔炤

新設屯田

廟議既不與屯田徒有名河北山東地水利難與爭當  
先布賞格有司乃奉行隱覈召民種亦須三年成吁嗟  
恐不及不如先議兵兵既不如議田亦何由耕

一鳴示兒

焦明生三雛憑虛振其羽一雛巢阿閣一雛罹網罟一  
雛能高飛下視歎苞栩黃雀謝少年青鳥報阿母鳳凰  
來見稀一鳴遂千古

萬燬

冬夜同舒子愚同年姜敬叔友人步月高橋

愛月步高橋霽色如秋半石上霜痕明湖中水影亂飛  
鴻照字連燭火爭光散瑩徹曙徐亭寒泓浸孔泮通宵

不夜天四壁無塵漢冬景此難逢同君長行玩放歌莫  
言歸對酌觴休算酒興動詩脾清吟弄柔翰

黃尊素

夏日同曹元甫履吉坐凌雲山

我來敬亭下江練仍如昨青山在目前謝公如可作入  
城畏塵囂借此看樓躍置足不厭高洗心漸以擴素波  
湧湖口微風來叢薄俯視亂帆影往來相約掠指掌天  
下事宛然丘上壑我願驥尾蠅君其雞羣鶴相逢欲解

劍無忘今日樂豪歌俠少行晚霞為吹落

阮大鍼

郊居雜興

結室面東湖風來湖水香隨意採菱舟賣緣洲渚傍香  
靜月色吐清輝照中堂澹澹螢火流泠泠竹露光絡緯  
抱花啼啼聲亦何長鄰女弄秋梭竟夕燈火張晚田廬  
不給餘布易我糧聊以贍兒女非為成衣裳感此勞者  
情終夜為徬徨湖波豈不艷菱葉亦以芳刺多泥復深

采采中懷傷

平等菴雨宿

晏息向秋窓  
葉聲蔽山雨  
夢淺妙香侵  
宵孤百蟲侮  
慮盡復誰在  
境真安所取  
紛紛巖戶間  
微覺天花吐

侯恪

錄別

酌酒與君飲  
君去復何時  
不惜遲歡讌  
但苦別斯須  
昔為同林鳥  
今者各天涯  
歲暮霜雪寒  
道路嶽且崎  
浮雲

西北起望之使人悲徘徊感塞雁飛鳴知為誰

金山寺頂眺望

已看玉泉山更上金山寺寺影翳流泉蒙茸覆玉翠憑  
高眺遠岑前山靄如睡林木閟清陰礧石夾天墜中有  
黃鶴鳴緜蠻發幽吹洞口老仙人何時披薜荔不得從  
之遊聊此寄餘思

繇碧雲寺迤邐至玉皇閣傍深澗行十里許


雨過前山淨峰花細可數迢遙見虛閣崔嵬出煙縷携



杖陟其巔蒙茸披蓐莽重岡亂縱橫深谷分子午循崖  
悄無人慄若遊天姥微風動壑吟谿流互吞吐曲折十  
里餘身如生毛羽夢來非一日于焉愜所取



御選明詩卷三十二



總校官庶吉士臣侍朝

校對官檢討臣蕭九成

謄錄監生臣傅瓌芳

欽定四庫全書薈要

集部

御選明詩卷三十三

詳校官原任事

臣

李斯咏



欽定四庫全書薈要卷一萬八千五百三十三

集部

御選明詩卷三十三

五言古詩十八

陳萬言

出門

出門澹無營閒步郭北隅四野一何曠仰見秋雲徂微  
風動蕭林殘暉息遠墟忽然霞氣新散綺照輕裾高歌  
以忘憂薄言返故廬

長夏憇澹止園

辭家謝塵慮結意在巖壑登高畏炎蒸園林寄幽託澄  
湖逼遙岑仁智均所樂入徑參茂松環洲雜芳若灌木  
挺喬榦疎篁解新籜中有百尺樓憑虛蔭寥廓青山四  
壁垂雲氣屢迴薄朝汲葛翁水夕放支公鶴披襟步湖  
湄飄風散花萼逃暑蕩蘭桡迎涼啟羅箔清宵寂無人  
倚石縱盤礴歸偃北窓隅三五映籬落覽化得沈冥感  
遇任離索物理本如此俯仰亦何忤

高道素

兗州道中寄內

黃沙蔽天氣白日無晶光  
寒雲何蕭條四野青茫茫  
驚颿激車輪我馬亦玄黃  
憶昔出門去臨別重徬徨  
九月無裳衣五月無糗糧  
酸辛各自愛努力願相望  
悠悠二千里安得到汝旁  
中宵不能寐輾轉心憂傷

馬任遠

夜過亂石灘

星散江猶暝輕舟過亂石水石苦相爭灘頭聲淅淅石  
齒列虎牙水花散瓊液飛瀑照夜光不辨江中夕帆影  
隨波迴去石不盈尺幾入陽侯宮過此尋岸泊水際映  
沙明一望連天碧

晚渡淮河

夕景散濠梁周回淮水外方之大江濱渺爾一衣帶波  
濤起其中于焉亦氣槩沙明月在湖樹靜風生瀨憶昔  
漆園公觀瀾心自快魚水本忘情遠人欣所愛我來一



葦渡浮雲驚世代樂意付水濱徒茲發感慨鷗鷺各呈聲  
荇藻爭作態萬慮俱東流蕭然鳴天籟

瞿汝稷

黃州雜詩

明月翔雲漢何心衆憂喜管絃醉蘭卮笳斗悲戰壘盈  
缺不自期二陸從所履當此清輝溢流照山川美幽檻  
佇虛白素心淡于水鴻荒非我先酬酢巢居子云胡北  
林鵲驚飛未能已援瑟扣清角悵望扶桑暎

發齊安偶成

匣我龍唇琴勿復奏流徵要眇諧宿襟不入郢人耳念  
此中徘徊抑按從下里唧嘈聚樵牧衆愜心自鄙迴軫  
謝羣聽拂絃返吾始河魚雲際鶴曠世尚知已

王敬臣

古詩送陳憲副雨泉之任滇南

黃鵠翔四海潛蚪樂泥蟠飛沈各異塗言就性所安公  
行越萬里予留守故灘公勵王尊節九折驅無難予含

令伯誠有懷良未殫俱奮古人心咸思效寸丹臨岐申  
贈言睽離何足歎相期慎明德歲晚同金蘭

田藝衡

夜投禪院

暝暝溪路轉初月隱林間孤燈在深竹清流影前山倚  
樹露欲滴扣門僧正閒宿好雅相得明發何能還

謝三秀

城南江亭

旦發虹梁門暝投漁磯路春水半篙綠褰裳不可渡溪  
深煙復深遙遙辨庭樹

晚泛蕭湖尋宋人虞仲房石壁

川光鬱初霽野航恰受客天空斷雁哀水落寒沙積絕  
峽響飛泉飄颻足練白涼葉不禁霜楓林還槭槭輟櫂  
湖之陰突兀見瑤碧恍疑太始雪拔地起百尺登眺極  
人目了了晰阡陌胡為水窮處乃有此奇石昔聞避地  
者于焉卜其宅愛茲雲木秀重以巖潭僻靡旦匪蘭橈

或時仍柘屐遺咏蝕苔紋風流已陳迹高躅杳難攀我  
來徒惋惜商飈增暮寒旨酒若為適興盡鼓柁歸滄浪  
黯將夕

王象艮

豫讓橋

義士負奇節所重在知己讓也慷慨流恩仇惟一匕將  
以酬智伯勢必危襄子一往志不返肯以彼易此所重  
者一言所輕者一死荒橋至今在過者猶興起立馬對

斜陽湯湯聽汾水

華善述

雜詩

白髮白更長  
白花白更香  
春風一相見  
歲月久難忘  
君耕石田熟  
余亦起羣羊

山中作

達士貴薄遊  
幽人安坦步  
耿耿梧月初  
蕭蕭竹風暮  
握蘭青厓陰  
采蘋寒水渡  
荷衣秋始製  
何用畏多露

答錢化臣

玄蟬餐清風長日鳴茂林蟋蟀飲繁露永夜莎根吟二  
蟲夫何知聽者多苦心絃桐與無絃視之誰非琴曰余  
室湖渚開戶當遙岑既無簪組累又鮮轅馬臨終歲足  
暇豫長謠散幽襟偶為好事傳詎取時名侵媿君錫嘉  
譽撫已安可任

庭草作花有感

中庭無嘉植青碧翳芳草秋至花亂開翠色亦自好既

不藉溉灌復無採摘擾無名且無種生意可常保

梅守箕

詠懷

愛極翻自疑驩極易以悲所以樂莫樂固在新相知皎  
皎中天月虧盈尚有時惠思念疇昔忉怛無好懷歲暮  
空堂上明星照我扉身各天一隅安知渴與飢慰我同  
心人膠漆未可期

索處無適懷羣居興怨尤素交夙已盡閹閹起相仇甘



醴善迎人終始寧為謀同心託蕭艾一器戒薰蕕匿怨  
而友人見鄙于左丘信哉朱穆言獲我心所求

古詩

日月易流邁哀榮曾何期霜霰忽來集衆芳忽已辭物  
象貴其新故心誰當持懷念如夙昔中情苦不怡人生  
一世間離合亦有時超忽即變化展轉焉可知

梅鼎祚

雜詩

智愚無常稱妍蚩無定容名德貴易立顰笑賤難工登  
高疾赴響所處固已崇流俗快目前安得察其終

雜感

忽忽中不懌駕言陟高丘高丘臨四野湛湛長江流豈  
不懷所歡欲濟無輕舟佳期曠何許歲月倏已道蹟往  
既非故撫來難豫謀俛仰千秋間涕下不能收

吳元樂

春日有懷仲仁

獨行墟落間舊徑生芳草一見蝴蝶飛三歎青春好故  
人不可同能無傷遠道

宋登春

留別榆關知己

促駕遠行邁迢迢事東遊  
紉蘭思楚澤結荷憶吳洲  
嶠嶽遵恒麓迤邐凌燕陲  
所歷無停跡居然隘九州  
投志在道義脫劍為誰酬  
念子宿昔交欲去復淹留

山中曉起

習靜來山中長日臥松關川光媚几席山氣清襟顏翩  
翩雙鳥沒嫋嫋孤雲還萬物各有適無荅意自閒

馮遷

與俞仲蔚

仲蔚青雲姿偃蹇山澤間遺棄當世事賦詩獨精專大  
雅既寂寞下接蘇李肩晨昏弄筆札几席生雲煙流傳  
翰墨林字字堪磨鐫相過遇佳夕春風盜和顏燃燈設  
清醴微興相與宣高懷曠千載鬱鬱忘冥筌所嗟歲云

暮何以奉周旋

安紹芳

山中夜坐

夜氣何蕭森空山思寥廓不知風露寒彌覺衣裳薄美人渺難期對酒不成酌白日虛牖生微聞桂花落

譚清海

西遊別貞復

君望東海歸予從西粵遊興言感今昔行路何悠悠白

日往不返頽波逝東流青青澗中蒲泛泛江上鷗連枝  
與比翼庶以解我憂

陳有守

遊邵氏園

極目眺遠山振衣出東郭白雲媚幽岡蒼煙澹長薄登  
臯一舒嘯餘響應林壑空緇城市塵未諧江海諾夙心  
愜超曠世故任龍蠖

盛時泰

擬古詩七十首

并序

錄二首

萬厯改元予因陪貢寓婁水于俞仲蔚邂逅顧按  
察投詩為贈婉孌綢繆不我遐棄離筵既陳貽以  
王鳳洲先生擬古詩披省慨然因次其韻三日而  
畢

應文學場侍集

華堂秉列炬光景中夜全忻此良宴集侍坐俱忘還自  
慙鉛槧徒得以廁芳筵四座盡妙士醉後唱高言揮毫

不停飛侍女出邯鄲年齒二八餘桃李為面顏促膝進  
旨酒雕楹奏鴟絃一飲盡百卮不惜年歲捐豈不念窮  
困所托在芝蘭馨香入懷袖永矢願弗刊

何水部遜示

流英辭媽紅芳苔敞初碧感茲春日晴忻此夏雲色高  
天下薰風中林啓瑤席閒怡衆蔚舒靜悅清商激懷中  
瑤華音門前車馬客懷刺始見投牽裳不假幘容輝一  
以邁琴樽愜所適罵坐無往人投轄有新跡幸此休沐



閑無言朝請迫明星方在戶雞鳴以為則

張名由

夏日田家

風過林花落雨餘溪水渾飛雲停不去低回戀幽軒夕  
陽下平楚遠樹見漁村奄忽夏已徂憂懷紆且煩四體  
弗能勤興言媿鹿門吁嗟劉景升車騎枉山樊

蓐食節次下鳴雞尚蕭蕭褰衣涉遠道負耒正逍遙種  
豈不成頃陰曠不終朝飄忽風雨至歸農趣危橋其雨

復其雨  
荳稀草萋萋  
叢林戴勝降  
女桑多長條

空堂

秋蟲響空堂  
纖月下幽渚  
鳥驚風外林  
花落庭中樹  
羈棲興遠懷  
城阿隔秋雨  
耿耿良不寐  
脉脉以無語

秋晚

迢迢幽溪上  
寂寂野人居  
泠泠風入樹  
嚶嚶雞鳴墟  
白日三杯酒  
清秋一草廬  
閒花階下笑  
謂我意何如

俞安期

武夷

晨興命篙師溯流泛清汜鷁首轉石湍九曲茲其始峯  
巖縱異姿崖壁夾重詭參錯駭愕形萬狀不相似林林  
從孤舟紛紛列兩溪回眺天柱石端立若冠峙其上亦  
宏奧云有天池水易代投玉簡遣使歷千禩子騫謫居  
時仙客咸來止晉代八真人異姓四女子謫籍周有期  
上昇具由此控鶴彼何人曾否來主禮

繫纜仙船巖三曲漸已及云何二仙艇中壁懸石隙歲

月固不知神化亦奚測更無堯年潦安得逮茲息豈墜  
絳渚間天路將安適或由巨靈掌攜之化人國莫謂藏  
壑牢夜半負有力願借拯迷津衆人免沈溺

何白

長干客舍同周叔宗夜坐分生字

莊塗輶塵軌末路多所嬰况復歲道盡懷歸軫予情之  
子秉高韻神恬物自輕處順鮮有觸居喧若無營偃仰  
寄一室展玩忘寢興高梧散縹帙風琴落虛聲欄卑景

先夕墉高曦易傾幽光代明燭寒月暖前楹焚枯命芳  
醕歡燕惟平生情披語已洽壘虛時載盈寸襟得所遣  
冀此數來并

黃克晦

感時

繁霜凋草木谿谷正悽惻玄冥慘不舒改歲固云逼萬  
物各有因盛衰迭今昔寧見武安門猶納魏其客

江行

江風來自北弭櫂江水南白浪聒不息遊氣昏空潭曠  
野何蒼蒼引步隨幽探鹿鳴求其牡豐草非所甘江燕  
啄不食念雛聲喃喃物性固如此遊子何以堪慨彼江  
中水衝波無定湍古人忍飢渴肯矣非空談

夢遊武當山懷鄖陽江使君

祝融奠朱方五嶽有定目胡不以崧山並列而為六夜  
夢登其巔遊氣承我足千峯歷嶮巖如車走平陸上為  
帝者居星辰纏其麓崢嶸羽人宮參差徧巖谷中有不

死人終歲茹草木授我鳥跡書奇文不可讀雞鳴忽焉  
寤惋歎淚相續

胡宗仁

立秋後夜起見明月

深夜見明月漸低西南隅光華射虛檐照我牀頭書開  
函見細字歷歷如貫珠老眼未能讀惆悵坐庭除風生  
梧葉鳴光景殊蕭疎昨方入秋序清涼便有餘

曉聞寒鳥兼呈遠客

霜林棲鳥冷曙聽語簷間爭盼朝暎出移羽就其暄籬  
外犬忽吠有客至我門問客何能早云從遠道還命僕  
燒松火炊黍慰勞煩而我尚慵臥見客生愧顏

汪元英

感述

鷦鷯巢一枝鼯鼠飲滿腹林深河且廣曷不逞所欲柱  
下有遺言所貴知止足疏氏二大夫解組辭榮祿今此  
富貴人其欲何遂焉知敬器水一滿定傾覆



汪元范

得吳胙虞書

宿昔與君別乃在江之陽  
玄陰蔽光景草木日萎黃  
牀下蟋蟀鳴野外鴻雁翔  
居肆休百工我獨違故鄉  
跋涉千里塗空念川無梁  
有鳥東南飛毛羽何輝光  
口銜尺素書戢翼向我旁  
感君懷好音令我心難忘  
開緘再三歎意快神自揚  
離居無幾時所惜道悠長  
此身非雙鳬安能日頡頏

傅梅

園居

晝勞夕得適幽軒成小憇  
峯色落空青池光起浮翠  
須臾暝色深繁星看欲墜  
新月下踈簷微風動檐際  
樂此坐忘言悠悠更忘寐

汪樞

早秋刈穫述懷

杲杲朝日升垂垂水田熟  
芻芻呼白雞泱泱飲黃犢  
稍

稍溽暑收灩灩露華沃庭戶絕追呼春秋足魚菽卒歲  
計所餘修我牆與屋男悅女欣欣杯炙勞僮僕躬耕一  
丘田飽食詎非福

周應辰

古詩

行行重行行夕陽在崦嵫暮鳥有倦翼寒木無榮枝少  
壯不逢年垂老誰見知

吳宗儒

遊黃山

九月秋氣高抗策恣遊眺天都陟崔嵬洞門入窈窕緩  
行憇松根徙倚臨霞嶠探奇壑轉深攬勝景逾妙山蹊  
縈以紆石壁陡而峭瀑布挂晴川懸厓迴夕照地與仙  
境俱凌厲討佳要孫阮予非倫于焉學長嘯

傅邦柱

雜咏

鸚鵡多巧慧交交調好音翻飛嘉樹杪毛羽殊衆禽一

旦遭置尉萬里辭故岑彩絲紺紺趾雕籠照翠衿徘徊  
當簾幕聰慧增苦心鶯斯微以陋提提蓬蒿陰

潘之恒

贈馮顯甫

園中青琅玕娟娟間新綠上稍拂穹霄餘輝蔭華屋傾  
枝如有俟孤植非所卜低藂與幽篁嗟哉豈鳳宿  
客從遠方來遺我爨下桐飾以金玉微摻之山水中知  
音苟不存將毋束薪同喟然感雍門揮淚方未終

吳夢暘

和陶飲酒

何悔不學劒豈云不上書歸來坐涼月綠水周吾廬庭  
草一以新知是春風初故人惟故心獨不謂吾疎相向  
宛風昔豈不懷舊都舉目盛雲物安能無歡娛

茅維

夜坐讀書有感效坡老作短詩寄允兆翁晉李

豹三子

石牀橫素書漆燈挂青焰引襪不耐眠危坐意清宴瓦  
盆覆殘茗綺石當圓硯索筆賦短章書成自精綯冷月  
侵踈槐荒山噉羣雁蟲吟豆花中葉墜石苔面垂頭何  
所思闌干忽憑遍一入靜者懷機鋒似張箭恨無三益  
友相對發綺辨露濕還松房青林火不見

謝兆申

別意

我行且登舟子莫徒離憂眷眷戀我側去去難久留歎

息成參辰愁思不可抽丈夫在四海譬彼水浮舟聚散  
無定期感子叙綢繆

王野

出郭訪王叟園居

遙想棲託佳春霽引坦步鳥聲牆外聞花隔鼻先悟入  
門及賓館宛若下山路葱蒨清意滿簡密幾叢樹衆草  
冗不芟存為蠹動寓草木遂本性愛物見平素人靜池  
出魚屋衰梁飽蠹壁苔如畫山天然卧遊具園叟齒逾



羞似鶴林間遇內深冥真寄外淺備禮數恍惚異世人  
相對心疑懼雖疑且盤桓嘯歌日至暮

范汭

送顧生仲默

日日好攜手我閒君亦閒侵晨出郭門月落猶未還云  
胡輒改途不予車塵間

遲吳凝父不至

故人宛何在坐永芳時別別時櫻桃花離離子堪擷顏

雲忽成峯喧禽將反舌觸緒悵多違絲棼焉可絕

重送戚不磷遊登封

入門復出門平疇綠如砥春風吹柳花隨君日千里望  
望緱山雲心輕別妻子

吳鼎芳

靈峯山房夜起

寥寥青蓮宇出步夜方永蟬鳴四山秋鹿飲一潭靜圓  
月當碧空孤塔立無影花落樹猶香竹深澗亦冷煙光

散如水明星上高嶺

荅松上人過訪不值

孤踪石上雲飄忽  
本無住門外即青山  
一瓢向何處離  
心寄春草柔艷欲飛去  
引領生白煙  
花落祇陀樹

柳浪溪

山青秋雨後人坐秋風裏  
平沙下鷗鷺簌簌動蘆葦  
夜半明月光漁舟弄空水

虎丘菴荅蔣十

偶坐已夕照徘徊夜復深西岑見新月墮露聞松林覺  
有幽人來隔窻動微吟

嚴明甫園中

為園剛一畝生事已云足日午聞雞聲炊煙起茅屋石  
色秀可餐林香暖盈掬相見無寒暄惟言酒新漉

宿江上

山色下空江江光動舴艋霜楓紅不盡已入暮秋景來  
雁忽有聲歸雲漸無影醉卧蘆中花月高夢魂冷

泊北固山下

夕陽江色遠  
艤棹潮初退  
獨客吟清秋  
沙鷗冷相對  
水氣上城根  
風聲隱巖背  
漁舟載煙火  
撐入菰茭內

寺夜

林坳動蕭槭  
橡葉走檐際  
柴門夜忘闔  
山風自開閉  
邑邑如有懷  
遙遙轉無寐  
佛燈清可依  
城柝冷相遞  
斜月苦近牀  
嚴霜白滿地

度嶺

林僧言別去自憇松下石紅泉界空翠巢居叫霜笛夕  
光淡西水千頃成一碧冷信雁傳來秋容楓點出閒雲  
滿懷袖邀我過山脊

過高峯菴

林迴覺路枉路枉亦自適光風不作寒吹煙半晴濕澗  
春多異芳嶺月少行跡犬吠空山雲山僧杖藜出

夜至西溪

旋洄昧港脉輟棹蘆花灣迴風泛清響梧竹秋珊珊涼

月出復沒亂峯凹凸間  
峇堯樓隱處隔雲見故山  
如故人一見開心顏

吳兆

離夜

白露塗蘭堦秋燈耿離席  
風景淒以清情思紛如積  
隴庭樹光送君立門隙  
昨夜秦淮月今照板橋客

武夷小桃源訪劉道人

崢嶸入陷石石徑轉逾窄  
劃然洞門開斜光一道白  
白龍

湫流暗穴鳥篆繡苔額窮源有古村二三避世客避世  
非避秦棲心鍊精魄春田自耕刈衣食無需索風動棕  
花落雨過藥苗摘鶯啼林木秀犬吠暮空碧居然衆山  
中遂與衆山隔坐久恐迷誤歸路誌前石白雲洞口深  
似杜重來跡

秋日雜詩

新穀望將熟無田安可希飢驅兒女去同拾遺穗歸鳥  
雀爭喧啄不忍相逐飛夕春朝作飯朝春夕作糜賴此



保朝夕我心實傷悲爰思古之人貧賤甘如飴牧豕上  
林苑逃耕蒙山陞道勝聊自慰欣咏衡門詩

喜雨

沛然時雨來芄芃禾黍起我固無所望亦為鄰里喜晚  
向西軒眠谿雲滿窓几明日釣潭側應深幾尺水

秋野閒行歸而有作

早穀已登場晚禾尚栖畝欣欣足慰飢望望非吾有荏  
苒十年間蹉跎東西走結交吳楚士氣味少淳厚徒令

田園荒轉與琴書負歸來掩荆扉趨向寡親友日月忽  
已除秋氣凋榆柳卒歲何寥寥涼風吹戶牖念往固已  
遷嗟今將何守昂哉黔婁言斯志儻不苟

徐允祿

贈丁長孺中翰北上

浮雲滿天地君子意何如庸庸不可為矯矯亦多虞長  
路自此始願言遵康衢安得執鞭弭從子以前驅

徐應雷

寄陸純孫

神魚樂深淵奚必易水潯  
威鳳集高岡奚必燕山岑  
登臺眺大江蒼蒼楓樹林  
眷言懷吾友忼慨為悲吟  
鴻雁日南飛助我厲商音  
悲哉歲將晏況此天涯心

齊菜名

送員倩姪北遊有懷越石

浮雲澹秋陰涼飈振高木  
素質發商聲晚花霏餘馥  
明發秣驪黃成裘促童僕  
燕趙多佳麗驅策恣遐矚  
送子

遠將之行行復不于白日忽以沈夕景暖平陸霜驛漬  
相紅寒燈照酒綠會日渺何期別畧有成速縷彼夢草  
人吹簫不成曲仰聽離鴻鳴沈憂心轉轂寄言畏途艱  
勉旃慎自玉

吳沛

西墅草堂初夏

結茅在西墅差遠塵市喧漠漠天宇接遙青納短垣榆  
柳當窓搖清陰罩几痕鎮日少過客不知接送煩家貧

饒藜藿一飽腹自捫高低五男兒暇即與討論千古在  
目前絕學垂憲言浮榮何足慕潛心味義根我愛夏初  
長寸陰當思存

觀穫

秋事告方及萬寶已觀成高下盡垂穎但祝秋常晴婦  
子腰鎌集老稚曳車行相顧樂相笑飽飯不欲爭有叟  
頗好飲分漩在香杭力田苦終歲鼃飲腹易盈

向午睡初足駕言陟前岡刈歌互相荅因風與之長棗

實何纂纂雜間梨與棠田叟具壺榼相飲已夕陽不覺  
城市遠仰見歸鳥翔

篝車亦已滿還入此室廬牛羊下日夕煙火生柴墟鄰  
叟無無累檣奕何軒渠將以娛村夜濁醪與之俱人生  
百年幾憂患胡為紆

秋涼入林薄四壁蛩聲傳稚子還讀書青燈西牖偏六  
經乃菑畬寸陰良足專先世鮮中產胼胝資遺編矐言  
彼良農逢年在力田

卓發之

題畫

瘦石橫奇姿江梅舒素萼芳影入檐楹  
流光恣清謔照耀白衲僧孤雲映寒鶴  
如何咫尺間便似遊寥廓

王龍起

寒蛩

寂寂冬夜長燈火輝微光寒蛩窓外鳴  
皎皎月入房何由迫人耳髣髴在我牀  
感懷難就寐曳屣步中堂凭欄

細傾聽忽遶樓上梁風多不成曲啾唧愁予腸伊伊重  
縷縷持此為誰傷空檐鐵馬動悲聲相抑揚正當霜漏  
盡幽咽倍淒涼

鄭脣驥

芥浮閣

結廬翳城市亦足成隱居耽寂乃非性習慣亦晏如時  
有素心人談笑同草蔬且喜足莞簟幸不礙圖書高原  
湧積翠好風起庭除竹景散窓紙花香浮衣裾睥睨夜



月永几閣朝雲徐漫興差筆墨放步但菑畚靜愛佛龕  
幽閒狎老農愚宇宙豈不廣閉門徒趙趙周容空爾為  
中心實難誣頭顱久冉冉次第及髭鬚世味差能薄何  
為復忍濡與世淡無事夏屋空渠渠所以古人言吾亦  
愛吾廬

東風入林間春事看已馥鏡裏髮方華樽中酒初綠日  
將蕭灑意靜與良辰逐最宜檐蕭蕭

時苦旱

偏憐晝穆穆

撫几攤故書聽泉到新瀑高歌偶當窓什筩或村塾往

來地自偏俛仰天如沐畏聞剝啄聲愁東問事牘惟餘  
二三子相尋來不速亦知四壁空忍使兩峯蹙聊復安  
容膝未省辭脫粟飽食幸無事此外百不欲少遊哀大  
志老聃戒為目每笑學奕人所思在鴻鵠斯言差我心  
傲名非傲俗

魏冲

從鄧尉靈巖天池諸山歸治平

落葉千峯黑籃輿問何處犬吠知有村石蹲疑虎踞童

子數相失前後遙相語望望漁火生還歸石湖去

豐越人

晨汲

晨汲往東澗澗石何齒齒遊鱗既濯濯清流復瀾瀾天  
翠翻在下丹霞亦孤起冷然會我心濯纓乃空水撫茲  
成一嘯因悟無生理

積雨懷屠田叔李賓父

秋來霽無時江光夕如縷徘徊空郊雲蕭條雜飛雨曠

望極暝色疎花澹風渚層城有佳客相思一延佇林霏  
莽復合孤煙鬱平楚何當遲皎月長川下柔櫓

徐顥

見落花

流景忽西靡芳樹春易遷落花與白髮不得相周旋持  
此汲汲心詎敢戀百年陳酒開古書其人已如煙逝者  
勿復見但為飲者憐

朱治憫

麥章閭贈硯

麥君遺我硯，采自羚羊峽。鸛之鵠之眼，審視碧光眨。白  
如蕉葉萌，黑比魚雲壓。中有青青花，瑣細不可掐。山川  
蘊精氣，匠石變遺法。雀斑幾點露，鮒血兩邊夾。外規直  
且平，中池淺而狹。注茲水一泓，三宿尚容畝。我來吏端  
州，判牘日鈎押。勞人何草草，有時服韎韐。頻年硯欲焚，  
是物不我甲。朝來三摩挲，貯以琉璃匣。他日抽簪回蓬  
窓，恣賞狎作詩。崇禎年月涂，歲協洽。

楊文驄

遊太湖龍觜

晚色澹將夕探奇出林藪大龍與小龍礪齒震澤口鱗  
而鬚鬣張嶮岬悉諸有落潮洗泥塗寒玉森戶牖淘沙  
尋金書人各繫在肘吾欲窮其幽慮為鬼所守肅然袍  
笏侍下拜不敢苟豈知層雲根乃勝洞天九

鄭鄠

老樹

氣暖草木秀乃當搖落期物候自然異榮枯豈有私深  
山老樹寒不受風雪欺露根氷崖上亦自生理滋感此  
耐深念獨立高秋時

飛來峯山房即事

峯來自何年到此遂常住陰森碧雲寒宕崑空翠注松  
竹滿纓絡睂目秀可數洞壑迴玲瓏轉入靈氣沍此中  
誰往來疑有真人聚冷泉繞峯出峯頭滴雲赴山亭署  
翠微尚有蘄王句英烈想當年蕭疎蹇驢步小坐發長

懷兩峯片雲吐遊人跂月明雨到亦堪賦陰晴理何常  
山靈自朝暮夢闌一宿覺待向三生度

姚孫槩

久雨新霽喜殷氏兄弟邀飲

閉門十日陰門外喧屐齒已聞前谿漲更見屬垣圯曜  
靈胡匿輝風雨橫如駛暮霞照東隅魚尾差可擬凌晨  
下檐楹邂逅逢之子相邀臥甕頭一斗飲未已醉翁意  
有在歌者聲且止



徐石麒

贈同鄉朱六符

予本同園蒿飄在天一端咫尺杳與梓邈若霄漢間翔  
鳥憇前林猛虎戀故山傷茲遠遊客中夜積悲歎忽遇  
故鄉友驚喜相盤桓把臂問舊事耆舊半摧殘憂根長  
愁條淚下如奔湍樽酒非不旨安能起沈歡幸君到故  
園為我傳平安

謝劉太史湛陸惠詩

予曾過大梁臨風懷伊摯秉耒耕莘疇遽抱唐虞志一  
民不時雍內溝發深思此道久已陳夫子願躬試文行  
動至尊龍頭親簡置既窮太乙奇復發鴻寶秘早晚宜  
相麻天下乃得治麒也嵒窳人所受盈其器承乏白雲  
省爰書失聖意投荒分所宜而况僅播棄譬如累碁者  
累高勢自墜烽火滿近郊逐臣正遷次感君懷芍藥題  
扇以相遺奄然蓬蒿人儼若佩華璫此情何可酬此念  
何可寘頓令松柏心白首欲自刺

郭紹儀

遊仙詩

少室垂三花盈盈秀茵閣我軀一卷石偃蹇臥溪壑輕  
陰歛素秋虛簟散紫籜自得枕中秘始知塵外樂容成  
采玉芝抱朴煉五藥矯首鴻天長此志欣有託

李模

寒夜有懷

浩浩夜氣長霜氣凜寒衾思來乍如髮繚繞不可尋清

夢脩飛越山海何崇深孤月懸青松鶴子多奇音戶牖  
洞開豁中有綠綺琴

侯峒曾

晚行餘杭山中

解鞍一散步羣峰亂將夕浮嵐羃遙青喬柯拂深碧須  
臾落霞散銀紫紛狼籍尋蹊得絕澗驚濤互欹射有如  
翠蛟舞飛下三千尺一步一回顧已覺耳目易此景宜  
急追一失難再獲

侯玄演

雜詩

道喪向千載  
百家日浸淫  
如彼鐃磬歇  
逐響遺其音  
元宰何微茫  
悠悠費追尋  
世皆尚雕飾  
未敢明此心  
微言會將絕  
太息空撫襟

袁繼咸

讀謝臯羽西臺慟哭記

南方有朱鳥  
飛中虞人弦  
飼以金精粒  
對之不下咽  
粒

味豈不旨不如南土泉黃冠志弗遂碧血流濺濺有客  
感意氣慟哭西臺顛擊碎鐵如意悲響震巖川歸舟不  
成寐髣髴語燈前嗟彼積翁羅我非雀與鳶夢炎何足  
刺知己殊未然周粟不可茹箕疇曾未傳生死良非苟  
忠孝各自全謝子幽明契聊以秘懷宣言罷倏不見月  
明高在天

董守諭

憶婁子柔

與君隔山川邈然託素臆靜言想德容淵致若不測宛  
然河汾生論文篤悃悞使我飢渴懷如飽秋稼穡斯文  
儻我期願言求懿德

萬元吉

遊月巖謁周元公廟

中歲不聞道汎汎逐萍梗緬懷先哲型沈憂不出頰茲  
來矚巖月鬼斧鑿天影尺竇洩素雲一星射瑤井物理  
竟何如遐踪忽深省元公昔幽憇萬慮悉以屏陰陽動

靜初澄心得妙領于焉瞻遺廟百世尚嚴整冥心無極  
前衣露遍清冷

馮一第

旦山避暑擬陶

築屋俛城郭時覽物外清閑戶納山影開窓峯壑生青  
青萬古色衆動自虛盈頗悟人境裏高懷自縱橫  
結廬傍虬龍樹高千百尺葉響吹江上橘洲清歷歷帆  
影參差去北望洞庭極



滿閣綠陰生納涼適我情好鳥坐檐角細矚句讀聲偶  
影為欣賞仰看木華榮休夏且自恣坦然思時名

魏學洧

擬古

遊思隨飄風遠歷杜陵道道旁合歡花悉成斷腸草紅  
顏不堪駐妾愁君亦老為樂逮良辰歸來何不早人生  
數離別百年非壽考擾忙風塵中榮名詎為寶

所思不可見彈古相思曲曲中竟何言理短情自促野

弁非不香采之徒躑躅今日白頭吟昨日黃金屋

和陶

志士有奇懷何為翳我情吾身如聚沫所寶非榮名但  
問寓世間何以了一生秋風隕枯葉慄慄心自驚時哉  
不我待淹留欲何成

夕陽在高柳黃葉依風飛我心匪傷秋不覺心獨悲慷  
慨向前行動念多所依長道渺無畛究竟將安歸中夜  
發長嘯一嘯百念衰但得此中樂百年願無違

問余何所好所好在六經不作亦不述好古未有成笑  
彼百家言戛戛何紛更屏去勿復覽閉門書黃庭滴露  
小窓前好鳥向我鳴此際意無限默默緘我情

讀史

魯仲連

鄙夫寧一身身外匪所計有如魏帝秦何與魯連事先  
生獨個儻慷慨決大義白日走秦兵誠哉天下士

吳懷賢

喜雨

黑雲漫四山殷殷雷聲迅  
麥秋正及時忻逢時雨潤  
漸瀝打窓過溝渠盡流濬  
旱久有如此喜不獨田畯從茲  
卜豐年倉箱佇充牣

念彼幅幘廣生成藉化工三時苟愆澤何以望芄芃銀  
河瀉九天沛澤何冲融原田忽臙潤青苗交遠風始知  
蘇民困蒼蒼本大公

王清臣

述懷

人生如泛梗飄飄殊無根  
飲啄得幾許營營晨與昏  
對此春日好荷鋤出南原  
近觀草色敷靜聽鳥語繁  
有身貴適意窮達安足論

李世熊

和陶擬古

茫茫宇宙內美者長不完  
玄豹裁為裘紫貂製為冠  
豈以文采姿助人為容顏  
所以養志者蓬累甘抱關  
胸中

傲儻意微見于毫端趙璧寧肯獻隋珠詎輕彈尚父雖  
鷹揚不如鍛羽鸞編茅茹木實聊以禦飢寒

和陶飲酒

鳩能知天雨鵲能知天風嗟哉此微禽託命風雨中用  
志久不分遂與造物通吾亦晚有聞天道猶張弓

田狩龍

新構鍊石閣于惠山菊秋日與華閣脩夜話

豁然山氣清秋色是人目葉脫樹愈古依山結矮屋中

有酌泉人著書雙鬢禿忽聞剝啄聲巾車訪空谷後園  
采病蔬破甕葛巾漉溪山落日晚淡靄入山腹聳肩恣  
苦吟陶潛盈把菊短檠坐黃昏相與媚幽獨山風生夜  
涼亂鴉噪林木

陳衍

善才岫夜坐

江煙吐寒燄倒映星河明潮回石勢險孤岫西南傾扶  
筇倚危坐仰攀崖樹橫夜色一何曠波濤良未平奈何

羈塵鞅促促浮此生吾愛鄭子真谷口田可耕

送潘子木

送客上高樓樓高望客舟但見帆檣立不見客回頭始知登遠道兩情難自保

聽泉閣早起

山曉天氣肅衆星望已空殘雨戀宿雲猶在寒巖東物象紛勞役明晦互有窮琤琤石上泉日夜流無終

葛徵奇



晚眺隅園

三月十日雨薄霧花濛濛  
小大澗壑鳴百道源相通  
潭魚躍新水園竹抽春叢  
禽鳥忽變聲迺知天氣融  
登高一以眺澄覽衆慮空  
玄理羣所貴耳目悅且充  
于焉坐垂釣自擬滄浪翁

李奇玉

潭柘寺讀書

讀書潭柘巔身在白雲裏  
開軒豁遠眸風瀑洗心耳  
古

木挂青蛇云是二龍子下方鐘磬餘僧寮各棲止山童  
剔殘燈掃葉烹泉水闐然羣籟寂明月射窓几

徐柏齡

春日

風聲起松末窈若萬壑深誰謂市井喧遂無天地心可  
惜天桃花不言萎空林明年縱復開顏色不如今

張溥

贈姜如須

獨立見明月與我山水期  
潛虬自岱澮高深萬物儀  
理楫陶賓客樽前逢河湄  
一見即狂笑別遽何所思  
擊缶期永夜樂莫心相知

姜垓

寄吳學士

飄飄楊白花溶溶大江水  
天衢既阻修良人隔萬里  
妾身如飛蓬貞潔聊自矢  
朝立青雲端暮倚朱樓裏  
四顧多傍徨塵沙蔽野起  
梧桐摧為薪蘭蕙化為枳  
中夜坐

長歎皓首思君子

楚山有良璞昆池有奇琛投之非其主誰能明我心掩  
袖向前浦驅車出丹岑延頸蓬島上白日忽以沈北首  
瞻行旅邊雨正浸淫念我平生交淚下沾衣襟

楊廷麟

懷楊進士

青青東門阪上有蘿藤結願得一心人白首無磷涅周  
才慎所處不敢居明哲開戶見性情羣動齊巧拙翔鳥

安其巢離獸營彼穴萬物各為友吾生何所悅名山豈  
易求耦耕效長桀

陳宗之

擬陶

藹藹堂前木時至忽成林首夏方澄和凱風散幽襟我  
愛白日靜觸物每微吟息影盤石邊時鳥懷好音鼠壤  
有餘蔬東醵聊自斟雖無高世軌撫已安夙心先師有  
遺言謀道匪自今已矣何所羨林棲豈在深

登翁漢津水臺

朝臥采山堂暮登漁山閣漁采俱在山始信湖中樂閣  
盡有高臺宕堯出寥廓茫茫笠澤帆隱隱浮屠峯秀  
無匿覽波光恣開拓始冬似佳秋風日猶晶灼古樹儼  
當階黃葉深未落葛翁不可招丹竈安所託空餘泛宅  
遊未踐褰裳諾宿契必有期無怨猿與鶴

遊金菴


放棹非有期泛觀湖中山偶然入幽境遂叩高峯關老

衲出肅客蒼髯映丹顏同坐絕壁下始知身世閒飯我  
青精香供我綠菊斑葑山甯已沒金菴徑可攀歸塗歷  
清溪荒寂幾灣環萬堆黃葉中清磬激潺湲月出每孤  
往又逐漁舟還



御選明詩卷三十三





總校官庶吉士臣侍朝

校對官檢討臣蕭九成

謄錄舉人臣傅瓌芳